

Kayëte nte kerëhnëkëhni Pol vëvë Kolos Wade yehëhna hnë inji kayëte

Nkol nte wacëde Kolos na naŵëlëna g'ankol Efes na hnë Asi Toy hna (nte wacëde iŷi wati Turëki). Afayik Pol kerëk mpëd wati nte nkeho hnë kaso mbë Sesare (yëbëlan bëhn wafëhw imbëd gë warar gë bëhn wafëhw imbëd g'imbëd gë warar (53 gë 58) ga ndëcëk hnagi Yesu ŷa) ma hnë kaso mbë Rom (yëbëlan bëhn wafëhw imbëd gë ryaw ma bëhn wafëhw imbëd gë ryaw gë wahi (60 gë 62) ga ndëcëk hnagi Yesu ŷa). Yina nkol Kolos (Vëvë Kolos 2.1) bare ale hwëtahnëk yeho hnam macënde Ëpafëras (Vëvë Kolos 4.12). Umë sampehnëk Wanës Wakasëk na do fëgwëk Cery Sali na hnam (Vëvë Kolos 1.7). Ga ndëcëk wabëhn kore Epafëras njiko njëkehna Pol kaso hna pëyahna vëharan wamër va Cery Sali hna nkeni. Ankabahnëdëni tëfi vile wok tëfëлана toki, tëfi ntawëla na, háci ŷa, gë vantiyehn ikwëtahn kawary g'icëmb wamëleka gante nëjahnëdëha Wënu na gë vëhni. (Vëvë Kolos 2.16-18). Pol kerëhnëkëhni vële hwëtahnëk ye Kolos va tufahnëni soje ye mehahnëk vini vinahan: Këris ye fop ile valëkëfu ŷa! Fop vile ŷad nkwëna hnë vile ntik Këris kërëwa va wamër ye. Këris ntik fop ile rëfëka ŷa soje ipëh fu na g'icëmb ntëwu do

g'ibëhn ntëwu ña.

Wëlin wanës wakwëhn nafa hn'ïñi kayëte: fop, ile sowïk ÿa, yasery, bëmënkël fu hnë Yesu.

Wëlin gante nke kayëte ka:

Simpaÿi (1.1-2)

Pol camehnëdëha Wënu ña do njëfanëhnëdëhëhni vëvë Kolos va (1.3-14)

Ahnë gë antiyehn Këris (1.15-23)

Uwët afayik Pol (1.24-2.19)

Uwám hasëk gë Këris (2.20-3.17)

Vankeya soñe watere (3.18-4.6)

Simpaÿi rëkwa (4.7-18).

Simpaÿi

¹ Ami Pol, ale ye afayik Yesu Këris ÿa kabi Wënu ña ÿak koyëna, do gë Timote, aÿënta fu, herëhnëdëhu, ² wuhnë vëÿënta fu vëvë Kolos va, vëfacah do vëhahnëndak hn'ibëmënkël fu gë Këris hna: Arabi Wënu ña Rëm fu ÿa ndëwawu do njëdäwu yam ÿa.

Iyëfa Pol soñe vëvë Kolos

³ Acamehnëdenëha kwëlëkwël Wënu ña, Rëm Ahwëhn fu Yesu Këris ÿa, hnë wayëfa fu soñe hun ÿa, ⁴ kabi nkwëryëbun ga nësëde ikwëtahn hun Yesu Këris ña do g'ïñahn hun fop vëfacah va. ⁵⁻⁶ Ante tükëk ÿal hun wanës toña, Wanës Wakasëk, wati ryënkweyënkwe ÿa, njëtarun Wënu ña kwëtëk hn'ambin hna ile ramahnërun ÿa; ikwëtahn hun ña do ñahn hun ña hn'itama tac matik. Ha, hnë duniÿa li fop wañi Wanës Wakasëk kwëhna wadëwel do wok sampëd. Koyëna ntid fagant hun

kobëri fac le wëryërun do yëtërun ipërëna Wënu ña gë toña lëwü ÿa fop. ⁷ Epafëras, lawo lëwü fu do aryokuñental aÿahnik fu, umë ale harañëku, andokuñëhnëdëhu had aryokuñëhn Këris ahahnëndak. ⁸ Njëtëndanëkëfu inahn nte njëdaku Iyir Ipacah inä.

⁹ Wëlin soñe ye, cape lëwü fu ÿa, kobëri fac le wëryëbun pañare hun ÿa, tavëlëfuhna iyëfan hun ña. Tëyëdëfunëha Wënu ña ðanko pëbahnu uyët ile ñad ÿa gë fere fop useryah wä do gë hakili nte njëdaku Iyir ntëwü ña. ¹⁰ Koyëna kodun ayasu had gante tëfëka njasënd aryokuñëhn Ahwëhn ka do aliwu fop vële hnëñëdëha va. Alëwü fop wasifa vantiyehn vapërën had atëh nte lëwëd vantëwel vapërën do njëtëdunëha Wënu ña gë haÿary. ¹¹ Tëyëdëfunëha kwëlëkwël njawënu hnë fop gë fanka samah falëwü fa ðanko aÿëkaÿu fop gë ðuñëna. ¹² Camehnëryina g'uhnatah Wënu ña Rëm ÿa, ale lik aholu ahnuÿawu sah hnapul va vëfacah hn'ile kwëtëhnëku humpen hna. ¹³ Ankëcëkëfu hnë fanka imëhwëry hna do pakëtëfu hnë naw Ajë aÿahnik alëwü; ¹⁴ hnë umë apëhëtinëkëfu, wameh fu ña tavëhninëkëfu.

Ahnë gë antiyehn Këris

¹⁵ Aju ale nude ÿa ye aÿëntëlënta Wën hunte woyik nudëna, ale ryënkwek hnagik hnë fop vile liyik va. ¹⁶ Ha, g'umë Wënu ña ntik fop, hnë mbin hna do hnë nkal li, vile hnude gë vile woyik nudëna: wafanka wale ye mbin hna, vësankaf vële lañak tinki unaw ntëwü hni, do vëvë haryënkwe gë vële hwëhnak ucankaf.

Umë liyehnëk fop do soŋe lëwŋu, ¹⁷ do umë ye haryënkŋw fop; fop pëlalëk hnë umë ¹⁸ do umë ye ankaf cery sali, nte ye mbahn ntëwŋu. Umë ye wapëgwala, aryënkŋw nagi fagant vësëm, d'anko nkehahn avë haryënkŋw hnë fop, ¹⁹ kabi nëŋëka Wënu ŋa ile nke ŷa fop ntëf hnë Aju hna. ²⁰ Gë fere Aju ŷa, Wënu ŋa ñak konjëndëlehn fop g'umë hnë nkal li do hnë mbin hna. Antik yam ŷa gë sat Aju ŷa hnë kërëwa hna.

²¹ Wuhñë, kobëri ŋa gelunohna gë Wënu ŋa, vëyëw vëlëwŋu yerunëho soŋe fop wameh wante hnahañunëho do lifunëho ŋa. ²² Bare gaki, Wënu ŋa gë umë gë icëm Aju ŋa, ale sëmëk hnë mbahn ntëwŋu ahñë hna d'anko mëk tufahñu vëfacah konjëndëlehnëku fo haryënkŋw lëwŋu dënk, ale wok kwëhnana dahëse wëh, do ile keyande këm. ²³ Bare tëfëka awowŋu vëyãwah hnë ikwëtahn hna, soŋe antë aŷãwëtawŋu hnë tama Wanës Wakasëk hna wante wëryërun, wante pëyayini vahnë vëvë d'uniŷa vi fop do, ami Pol, yehahnëbu aryokuñëhn.

Uwët afayik Pol

²⁴ Tame natëko ile horotëdëfu soŋe hun ŷi, kabi padënëdëfu aki mbahn mën hna ile wojëk hnë wahorot Këris hna, soŋe cery sali nte ye mbahn ntëwŋu. ²⁵ Wënu ŋa ntiko aryokunkëhn cery sali. Ha, akwëtehnañëko iŷi d'oku soŋe hun: tëfëka fëyãwŋu Wanës Wënu ŋa fop. ²⁶ Wanj Wanës yabahnëf vile cowiniho kobëri ŋa fop vanjeh, bare tame tufëkëhni vëfacah vëlëwŋu va. ²⁷ Añak njëtëndanëhni gante naŷëk ka uvetak viŷë vile soŷik, vile ye hnë ile

pëhwëtanëhnëkëhni vële wok vëyena wasëwif: Këris hnë wũhnë. Hnë umë nke tama hun ña ayentahniwũ Naw Wën hna.

²⁸ Awa, Këris fëyadëfunëhëhni vahnë va fop. Niradëfunëhëhni do karanëdëfunëhëhni gë fop yasery, danko nkehahnëni vëhnaÿah hnë ibëmënkël dëw hni gë Këris. ²⁹ Soñe idi iÿin fop ÿa lidëfu doku hambah dus do wëtëdëfu gë fanka samah ile wãtik hnë Këris do hn'ami dokuñed.

2

¹ Ñadëfu ayëtu gante kambëk ka iÿi wët ile wëtëdëfu soñe hun, soñe vëvë Lawodise, do soñe vëhawary, wũhnë fop vële wok nulunohna muk gë vinkër vidëw hni va. ² Ntidëfu aki danko kamënaÿehnahni wasakahn walëw hni hna, mbëmënkëlahnëni hn'inqahn hna. Do koyëna, pëbahnëhni g'itama nte njëdahnëd hakili paryi, hnë uvetak lëwũ hna fop, do koyëna njëtahnëni ile nkoko mawëryalohna Wën kobëri ña njëti: ile sowïko, rac ye Këris. ³ Hnë umë cowïk fop hnapul yasery gë uyët. ⁴ Nësëdëfu wanj soñe ahnë antë tokawũ gë wanës wanëñah. ⁵ Lakënde gentila gë wũhnë, ntawary mën a gë wũhnë nkok. Anatëko gë wũhnë gante mënkwërun g'afërën ndampo fo do nkorun aÿawũ hnë kwëtahn hun Këris hna.

Uwám paryi hnë ibëmënkël gë Këris

⁶ Aki, kabi mañarunëha Yesu Këris had Ahwëhn, yasëryin ndampo fo gë umë. ⁷ Pëlëryin vënkahn hun va hnë umë do yërëryin fop

uwám hun wã hnë umë. Goryin ayaŵëntiwu g'ahaŵary hn'ikwëtahn gante ñañëndirun ka do asamehnënduna kantëm Wënu ña.

⁸ Kwëtëryin hakili ahnë antë pëlayehnu hnë warënd wanës wante rokad do wok kwëhnana nafa do hwëhnaŵak yasery ahnë fo: wante wãtik hnë wënamu vahnë, wante wãtik hnë wafanka wavë duniŷa, do wok matina hnë Këris. ⁹ Fop ile ye hnë Wën hna ntëdëk mbahn Këris hna ¹⁰ do hnë ibëmënkël hun gë Këris hna padëku fop, umë ale ye ankaf ucankaf do fop wafanka. ¹¹ Akácirun hnë ibëmënkël hun gë umë, háci ile wok diyina gë vák ahnë bare háci ile wãtik hnë Këris ŷa ye ile lihëtëdëhu ikihn vahnë nte wãtik mbahn hna. ¹² Ha, gë yary ŷa, ambañirunëho gë Këris, do fëna gë umë, amatëntirunëho hnë icëm hna kabi akwëtahnërun hnë fanka Wënu fa fale watëndëka Këris cëm hna.

¹³ Do wuhnë, vële yeho vësëm soñe wameh hun ña do ile worun káciluhna mbahn hna ma hnë Këris hna, Wënu ña njëdaku uwám ndampo fo gë Këris. Atavëhnëkéfu wameh wadëw fu ña fop, ¹⁴ apëhwëcëk kayëte hn'ile kerik wahnaw fu do yiryeryëkéfu gë sariya. Antihëtëk wati nte pakëk kayëte wahnaw fu hnë kërëwa Këris. ¹⁵ Ntihëtëk ucankaf wayir do gë wafanka wayir waŵeh, acëfëhnaŷehnekëhni tase vahnë fop, akahëkëhni had vëfëlayik hnë ambënt soñe imëk Aju.

¹⁶ Aki, antë aŵawu ahnë kitiñu soñe vile rokëdun ma sedun, soñe vambënt sali, soñe ulepera hasëk ma fac ntaŵëla. ¹⁷ Iŷin fop ye cën ile rëfëka tëki, bare ile ye toña ŷa wãtid gë

Këris. ¹⁸ Antë aŵawu vahnë vële ÿahnëk ßana dëcët, do icëmb wamëleka, vahnë vële hwëtëk d'us hakili hnë hufakery hudëw hni, ntehnënihu ntëntërun. Vahnë vërac naÿënađëni gë vinahan ahnë fo. ¹⁹ Vëhni, vëwona mbëmënkëlëni gë Këris, ale ye ankaf cery sali, nte ryavëd do vëmënkëlehnëk fop mbahn gë wasokël do g'ile sokëndëlehnëk waÿëc, do Wënu ña hnaÿëneđ mbahn tac.

Uwám hasëk gë Këris

²⁰ Kabi cëmërun gë Këris, pitëlërun gë wafanka wavë d'uniÿa. Bare, antidfun had uwám hun ŵa nkok hnë wafanka wavë d'uniÿa. Soñe ye ŵawëhnerun waÿi wasariya: ²¹ «Antë ahnuf iÿin! Antë aryah iÿin! Antë aÿak iÿin!»? ²² Vëÿin fop apud g'ibalëtahn: vëÿin dënk ye vakwëda do akarëña vahnë! ²³ Toña ye, waÿi wasariya mëntëlëk gë yasery: cëmbinëhna Wënu ña gante ñaden ka, mbanayin do ko-roteyehnin mbahn. Bare, waÿi wasariya gena iñë, soñe natëndan ikihn vahnë nte wátik mbahn hna fo ye.

3

¹ Mbëhnëntirun gë Këris, awa yëkëlehnëryin viÿë vëvë mbin va, hn'ile nke Këris hna, ntañak farëhw Wën hna; ² naharyin viÿë vile ye ambin va hara gena vëvë nkal vi. ³ Ha, acëmërun, do uwám hun ŵa cowik gë Këris hnë Wën hna: ⁴ fac le cahnahnid Këris ÿa, umë ale ye uwám hun ŵa, tac ŵuhnë fëna, cahnëntëderun gë umë hnë cëmb ntëwu hna.

⁵ Daŵehnëryin vile ye hnë ŵuhnë kwëhnëk nkal ñi: ndakëntal meh, ile wok pacëna, iña nte sëfëhnëk, viña vimeh mbahn do ibal dëcët ña, ile ye icëmb wamën wamër. ⁶ Wëlin vëyin ryojëd untavah Wënu ña, ⁷ wëli hak njasëdunëho kobëri ña, wati nte nkerunëho koyëna ña. ⁸ Bare dol ÿi, tavëtaryin vëyin fop: untavah, yab sakahn, wasifa wayap, wayëw, wanës wacamah wante sahnid hnë wës hun. ⁹ Antë aŵërhëhnëlëndu, kabi acudëtarunëha ahnë asër a, gë vantiyehn vantëwu va, ¹⁰ do cudarunëha ahnë ahasëk a. Wënu ña, ale ñahanëk a, kwëlëkwël nëmpëtëdëha mëntëlëni, gante njëtandëha paryi. ¹¹ Gaki, vëwona wasëwif ma vële wok vëyena wasëwif, vële hácik do vële woyik vëhácina, vëhneh, vële wok vëhnëgana, vëramp, vële ye afaya, bare Këris ye fop do hnë fop.

¹² Awa, ŵuhnë, vahnë vële tëhnak, pacënëk, ñahnëk Wënu ña, cudaryin vintawary vipëbah kaŷëhnahn do iguk, ibana, ipërëna do g'iduñëna; ¹³ mëkëhnëlëryin do, ge ahnë kwëhnanëka aŷëntaŵ vile curandëha, tavëhnëlëryin; had gante tavëhnëku Ahwëhn ki, ŵuhnë fëna, diryin koyëna. ¹⁴ Do kas, ñahnëlëryin: ñjahn ña ye ile vëmënkëlehnëd paryi.

¹⁵ Arabi yam va Këris ÿa naŵ hnë vintawary hun hna; Wënu ña macëku hnë mbahn ndampo fo soje iŷi yam. Camehnëryindëna kwëlëkwël. ¹⁶ Arabi unës Këris ŵa ntëd fagant hun hnë fop uvetak lëwu ŵa: karanjëlëryin do niralëryin gë vëŷënta hun va g'ufëbah usery; yëwëhnëryina

Wënu ña, gë fop sakahn hun ha, icamehn hun gë wahnëw̃ wale w̃atik hnë Vikerëh hna, gë wahnëw̃ sali wasëvah, do gë wahnëw̃ wale njëdaku Iyir ña; yëwëhnëryina do cëmbëryina Wënu ña gë fop ntaw̃ary hun ña. ¹⁷ Fop vile hodun ahnësu ma aliwu, diryin g'uw̃ac Ahwëhn a Yesu, asamehnatënduna Wënu ña Rëm ÿa gë fere Yesu.

Vankeya soje watere

¹⁸ Vësëval, mawëhnëryinëhni vësan hun, had gante tëfëka ka hn'ibëmënkël hun gë Ahwëhn hna.

¹⁹ Vësan, ñahnëryinëhni vësëval hun do antë ayapënanëhnuni.

²⁰ Vutah, mawëhnëryinëhni hnë fop warëmun gë wahnëmun, wëli ile hnëñëdëha Ahwëhn a.

²¹ Warëm, antë alavëndanuni vutah hun, g'antë tesani.

²² Vëramp, mawëhnëryinëhni hnë fop vële hwëhnëku va nkal li. Dokuñëhnëryindënëhni, hara gena had vële yëkëlehnëd vahnë va nëñëhni gë vëhni ma kabi njëkaderun, bare dokuñëhnëryindënëhni gë vintaw̃ary vipacah kabi ntënënerunëha Ahwëhn a. ²³ Gante-wo nke doku hun ka, diryin g'intaw̃ary përen, had soje Ahwëhn a, hara gena soje vahnë, ²⁴ ayëtatü nuÿadun Ahwëhn hna, had cos, intëw̃ nte kwëtëhnëkëhni bulunda Wën. Ale hwëhnëkëfu ÿa, Këris ye; umë ryokuñëhnëdun. ²⁵ Ale rufëhna catëna ÿa, acosahnëd soje rumpak lëwu w̃a, Wënu ña dëbëndëlehnëd'ilihna vahnë va.

4

¹ Wuhnë, vëhwëhn vëramp, pëlaryinëhni vëramp hun va gante catëk ka do gante cañëk ka. Dënkwëtaryin wuhnë fëna kwëhnarunëha ale hwëhnëku ambin hna.

Wanira

² Kahnëndaryin uyëfa hna; kwëtëryin hakili hnë uyëfa hna do camehnëryina Wënu ña. ³ Ndampo fo, yëfaryin fëna soñe fu gante pidëtëhnahnëdëhëfu Wënu ña rënka ña dänko fëyahñëfu viyë vile soñik vëva Këris va, soñe ile sëdahnibu ñi. ⁴ Yëfaryin fëyahnu wapacëk had gante tëfëka hnësu ka. ⁵ Yasëryin gë yasery cape gë vële wok vëhwëtahnëlahna Këris; balëtahnëryin mpëd nte njëdaku Wënu ña. ⁶ Arabi wanës hun ña ntapëhnañi kwëlëkwël g'ufërën, nëñ had wänjiry liyik, do aholu idëkwa ale-wo-le gante tëfëka ka.

Simpañi rëkwa

⁷ Tisik, añënta fu ale ñahnik, aryokunëhn do aramp Ahwëhn a ale hahnëndak, njëtëndanëdëhu fop soñe mën a. ⁸ Soñe umë fayëryidëfuha pëyawu bi hak nkoñun do mbosëvosehnu. ⁹ Onesim, añënta fu ahahnëndak do añahnik fu, lapëhnaryidëha; avë ñal hun ye. Anjëtëndañëhnëdënihu fop wante ryëcëtañ ani ña.

¹⁰ Arisëtarëk, ale sëdëlahnibun ña, nkañëryidëhu, tac gë Marëk, alintëra Barënas. Tëkërun ahnuñawu wayab soñe Marëk: ge njirik ñal hun hna, kacaryina g'afërën. ¹¹ Yesu, ale wäcëde Yusëtis,

nkaŷeryiku fëna. Fagant vēle ryokuņēd g'ami va soņe Inaŷ Wënu ņa, vēhni fo ye wasëwif; vēhni mbosëvosehnëniho đus. ¹² Epafëras avë ŷalënta hun ŷa nkaŷeryiku; aŷi ayohal Yesu Këris tavëdina uwët uyëfa soņe hun ŷa, đanko awowū vēŷaŷah, vēle lafëk hn'ikwëtahn, vēle ramahnëd paryi fop vile ñad Wën va. ¹³ Ambësadëfuha uņi cedëya, đokuņëhnëdëhu đus, soņe vēle hwëtahnëk vēvë Lawodise do soņe vēvë Iyerapolis. ¹⁴ Lik, lawo fu ayen, do gë Demas nkaŷënihu. ¹⁵ Gaŷëryinëhni vēŷënta fu vēvë Lawodise va do gë Nimëfa do bulunda ile varëpëlëd cery ntëwu hna soņe iyëfa.

¹⁶ Ge karanjërun aņi kayëte, diryin fere karanj fëna hnë cery sali mbë Lawodise. Karanjëgëryin, ŷal hun hna, kayëte nte herëhnëbuhëhni vēvë Lawodise va.

¹⁷ Pëyaryina Arësip kwët hakili hnë đoku ile nuŷak hnë Ahwëhn hna, đanko padënah n g'afërën.

¹⁸ Ami, Pol, kerëhnëdëmu gë vák mën iŷi simpaŷi: Dënkwëtaryin vankënca mën va. Arabi Wënu ņa ndëwaŷu.

**Vikerëh Vikasëk Wën gë Wapëgwala
Wamey: Vikerëh Vikasëk Wën gë Wapëgwala (New
Testament+)**

copyright © 2018 Wycliffe Bible Translators, Inc.

Language: (Wamey)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022
f961026b-f72f-5bd7-9f75-efa7f932577e